



CUMÜN DA SCUOL

Riassunt da la sezzüda da la suprastanza cumünala dals 15 avrigl 2024

Plan da quartier Buorna, exposiziun da cooperaziun

As basond sün l'artichel 21 da l'ordinaziun davart la planisaziun dal territori pel chantun Grischun dals 24 mai 2005 (OPTGR «KRVO») e sün l'artichel 126 da la ledscha da fabrica Scuol dals 28-11-2004/20-12-2005 cun adattamaints 2010/2011 vegn aboli e modificchè il plan da quartier Buorna dals 22 settember 2008 cun cumplettaziun dals 24 lügl 2012.

l'artichel 18 OPTGR esa stipulà il seguaint:

- La suprastanza cumünala expuona publicamaing il sböz dal plan da quartier d'ürant 30 dis in cumün.
- L'exposiziun dal plan da quartier vain publichada ufficialmaing i' l'organ da publicaziun uffizial dal cumün.
- D'ürant l'exposiziun publica poja gnir protestà pro la suprastanza cumünala in scrit e cun motivaziun.

La suprastanza decida da far la publicaziun dal sböz dal plan da quartier Buorna.

Augmaint dal pensum da lavur pel pulir ils bügls a Scuol, Sent e Sur En

Ün collavuratur cumünal vain pensiunà la fin da settember da quist on. Las gestiuns tecnicas han previs da surdar quista lavur a quel collavuratur chi til substituisscha fingià uossa e chi fa fingià üna o tschella lavur.

L'impiegà chi va in pensiun es impiegà cun ün pensum parzial da 50%. El fa lavurs in connex cullas immundizchas a Scuol.

I s'ha constatà cha'ls bügls publics nu vegnan pulits regularmaing e quai chaschuna reclamaziuns. Ils lavuraints dal provedimaint d'aua nun han la capacità per far quista lavur.

Tanter ils manaders dal mantegnimaint e' l manader infrastruttura es gnü discus quist problem. Els sun da l'avis cha quist'incumbenza stuvegn gnir surtutta d'ün collavuratur. Quai pudess gnir scholt cun surdar quista lavur al collavuratur chi'd es previs per surtour quella piazza. Uschè füssa'l impiegà in ün pensum da 100 % e surpigliess sper las immundizchas ed otras lavurettas eir l'incumbenza da pulir tuot ils bügls publics a Scuol, Sent e Sur En (var 50 bügls). Illas fracziuns d'Ardez, Ftan, Guarda e Tarasp (mantegnimaint vest) vegnan pulits ils bügls fingià uossa dals lavuraints dal mantegnimaint e quai s'ha verificchè.

Tenor l'ordinaziun d'organisaziun (artichel 7 al. 2 lit. d) sto decider la suprastanza davart l'augment dal pensum da lavur da 50 %, causa cha quel nun es büdschetà.


La suprastanza es perincletta cul augment dal pensum da lavur da 50%. D'utuon esa però da valütar la situaziun a regard ils lavuraints stagionals pella stagiun dal 2025.

Via da Liuns - etappa 6 (455 - 585 m): surdatta lavurs d'impresari, segunda part

La Via da Liuns es gnüda sanada d'urant ils ultims ons da suot insü. Uossa esa da far amo la segunda part da las lavurs da la 6 avla etappa.

Davent dal reservuar da Liuns portan trais condots importants l'aua in cumün. Üna part da quists bratschs es in ün nosch stadi e sto gnir renovada. Implü esa da separar l'aua netta da la chnalisaziun causa ch'ella passa actualmaing tras la sarinera.


La segunda part da la 6 avla etappa prevezza da trar sü e da colliar la lingia da transport dal reservuar Liuns (marcà cun culur blaua).



La suprastanza deliberescha l'import e decida da surdar la lavur d'impresari a la firma Koch AG, Ramosch.

Sanaziun punt Val Zuort: aboliziun dal proget e dal credit

Il Chantun ha da renovar la punt sur la Val Zuort. In quella punt es integrà eir il condot d'aua dal provedimaint cumünal chi ha gnü fingià diversas ruottadüras. In quist connex ha fat il cumün üna procedura per fabricats dadour la zona da fabrica «BAB» per sanar güsta eir la chanalizaziun da Fontana Sura chi passa a dretta i'l profil da l'aua giö. Quista chanalizaziun es ün impedimaint in cas da strasoras ed exposta fich ferm. Previs d'eira da far las lavurs in quatter etappas. La radunanza da preventiv dals 13 december 2021 ha approvà ün credit da 600 000 francs per quistas lavurs. I d'eira previs da spostar la chanalizaziun suot il let da l'aua e d'ingrondir uschè il profil liber per l'aua per augmentar la sgürezza.



Causa cha l'uffizi da god ha pretais sclerimaints plü profuonds a regard la sgürezza dad auazuns ha pudü gnir realisada dal 2022 fin uossa be la quart'etapa giosom tanter las chasas giö.



Intant sun gnüts fats ils sclerimaints d'ün büro specialisà (WNT Ingenieure GmbH, San Murezzan) e quels demuossan ün deficit da sgürezza sur la punt chantunala e pro la puntina cumünala. Sur la punt chantunala es gnü fabrichà ünsacura ün access privat da lain chi maina sur l'aua via. Quella punt füssa dad allontanar per augmentar la sgürezza cunter auazuns.

Impustüt nu bastessa be dad allontanar la chanelisaziun existenta e tilla metter suot il let da l'aua.

Tenor sclerimaints cun l'uffizi da construcziuns bassa, partiziun construcziuns cunter l'aua nu pon els finanziair masüras cunter dons per quist privel be per singulas chasas. Oter füssa scha'l Chantun saness la punt da Val Zuort. In quel cas stuvesna fabricar üna punt chi nu periclitessa il spazi abità.

Pel mumaint nun esa pussibel da far masüras cunter dons da boudas insembel culs uffizis chantunals, causa cha la chanelisaziun es tant inavant intacta.

Perquai decida la suprastanza:

- dad abolir il proget e'l credit per la chanelisaziun Fontana Sura in connex culla sanaziun da la punt Val Zuort, e
- da spettar fin cha'l Chantun realisescha la sanaziun da la punt chantunala e pretender in quel mumaint masüras da protecziun cunter auazuns.

Ramassamaint dal palperi vegl, Guarda

Fin uossa gniva miss duos jadas l'on üna «mulda» sülla piazza davant cumün a Guarda pel ramassamaint dal palperi vegl. L'adöver da quella sporta es relativ modest, perquai as dessa far impissamaints co chi's pudess reglar il ramassamaint dal palperi vegl a Guarda.

Scuol, 30 avrigl 2024

La suprastanza cumünala